

Agri

oesversekering

Polisdokument:
Inkomste waarborg

GEMOEDSRUS

King Price[™]
INSURANCE

FDV nr. 51794

Gelisensieerde versekeraar | FDV nr. 43862

Hier's wat binne-in is

Welkom by jou eie King Price polisdokument (KPPD)

| | |
|------------------------------------|----|
| Welkom by ons familie | 3 |
| Algemene uitsluitings en B's & V's | 4 |
| Die dinge wat jy moet doen | 15 |
| Ons eisprosedure | 17 |
| Gewasse: Inkomste waarborg | 19 |
| Sasria | 32 |

Klik hier

Ons kontakbesonderhede

As jy antwoorde nodig het... Gee ons 'n luitjie

Polisadministrasielyn 0860 21 00 00
E-pos agri@kingprice.co.za
Aanlyn kingprice.co.za
Dien 'n eis in agri@kingprice.co.za

Ons hoor graag van jou... Klagtes of komplimente

By King Price is ons nie net supergoedkoop en -doeltreffend nie, maar ook net so weetgierig, en ons wil seker maak ons doen ons allerbeste. Goeie diens is vir die koning uiters belangrik.

As jou konsultant jou dus op 'n koninklike wyse bederf het, of net eenvoudig jou dag bederf het, moet tog nie huiwer om ons te laat weet nie.

Of jy nou klagtes of komplimente het, stuur gerus jou e-pos direk aan die koning by king@kingprice.co.za

Jou eie agri oes- versekeringspolisdokument

Baie geluk

Jou boerderybesigheid word nou deur die koning beskerm

Aangesien jy reeds deel is van King Price se koninklike familie, besef ons dis nie nodig om jou te sê hoe wys jou besluit is nie.

Ons gaan nie doekies omdraai nie... Dis lank, trouens, dis meer as 35 bladsye lank. En dis omvattend. Terwyl jy lees, sal jy terme soos 'kernsplyting' en 'pit verlies' teëkom. Wat nog te sê van 'kiemkragtigheid'. Wie wil nou 'n lang en waarskynlik vervelige polisdokument lees?

Om eerlik te wees, miskien wil jy. Omdat dit jou polisdokument vir jou boerderybesigheid is. Dit verduidelik die dekking wat jou besigheid sal hê en dit sit die fyner besonderhede van jou polis en al jou verantwoordelikhede op (hopelik) die duidelikste moontlike manier uiteen.

Daarom, lees dit asseblief, gaan al die besonderhede in jou polisskedule na en maak seker dat jy die polisebewoording deeglik verstaan. As enigiets onduidelik is, of as jy jou inligting op datum moet bring, bel jou makelaar sommer dadelik. Dis in jou beste belang.

Onthou, onakkurate besonderhede = ontoepaslike dekking vir jou besigheid.

Koninklike groete,



King Price

0860 21 00 00

agri@kingprice.co.za

[Klik hier](#) vir die mees opgedateerde weergawe van ons KPPD.

04/23

Algemene uitsluitings en B's & V 's

Hierdie algemene uitsluitings asook bepalings en voorwaardes is van toepassing op alle aspekte van jou agri-oesversekeringspolis by King Price Insurance.

Verwysings na 'jy'/'jou'/'versekerde'

Alle verwysings in hierdie polis na 'jy', 'jou' of 'versekerde' beteken die polishouer wat in jou polisskedule gemeld word.

Neem asseblief kennis:

Jou risikoprofiel bepaal jou premie en alle ander veranderlikes wat verband hou met die dekking wat ons adverteer en aanbied. Dis jou verantwoordelikheid om jou profiel 100% korrek en op datum te hou.

Verwysings na 'ons'/'versekeraar'

King Price Insurance Company Limited (2009/012496/06)

FDV nr. 43862

Adres Posbus 284, Menlyn, Pretoria 0063
Blok A, Menlyn Corporate Park, Corobaylaan 175,
Waterkloof Glen x11, Pretoria 0181

Foon 0860 21 00 00

E-pos agri@kingprice.co.za

Aanlyn kingprice.co.za

Verwysings na 'onderskrywingsbestuurder'

Gemoedsrus Verskansing (Edms.) Beperk (2020/838907/07)

FDV nr. 51794

Adres Posbus 1564, Rayton, 1001
686 Blesbokstraat, Boschkop, Pretoria 0181

Foon 060 742 1942

E-pos info@gemoedsrus.org.za

Aanlyn gemoedsrus.org.za

Verwysings na ‘makelaar’

Die versekeringsmakelaarsmaatskappy wat as jou tussenganger met ons optree en wat die reg het om jou polis te administreer.

Jou versekeringskontrak

Jou kontrak met ons bestaan uit hierdie polisbewoording, jou polisskedule, algemene bepalinge en voorwaardes, alle skriftelike korrespondensie en enige mondelinge ooreenkomste wat aangegaan word. Maak asseblief seker dat jy vertrou is met die inhoud van al hierdie dokumente en dat die besonderhede wat in jou polisskedule aangeteken is 100% korrek is.

Onthou, onakkurate besonderhede = ontoepaslike dekking.

Polisskedule

Die term ‘bylae’ beteken die dokumente of latere endossemente by hierdie polis, wat uitgereik word as bewys van jou versekering en jou dus geregtig maak op die voordele soos omskryf in die verskillende afdelings van die polis.

Oop ruimtes

Die omskrewe voorval of omstandigheid wat in jou polisskedule aangedui is, is nie deur hierdie polis verseker nie indien die versekerde bedrag, skadeloosstellingsperk of vergoeding in jou polisskedule:

- Oopgelaat is, of geen geldelike bedrag daarteenoor aangedui word nie.
- As ‘nul’, ‘nie van toepassing nie’, ‘nie gedek nie’ of ‘geen skadeloosstelling verleen nie’ aangedui is.

Versekeringstydperk

Die ‘versekeringstydperk’ beteken die tydperk wat in jou polisskedule gemeld word. Hierdie tydperk begin op die begindatum wat in jou polisskedule gemeld word, en op voorwaarde dat die eerste premie (betaalbaar deur jou) betaal is. Hierdie tydperk sluit ook enige daaropvolgende tydperk in waarvoor ons 'n premie aanvaar.

Jurisdiksie

Hierdie polis is onderworpe aan die wette van Suid-Afrika.

Belastings/BTW

Alle premies, en eise wat betaalbaar is, sluit alle belastings/BTW in.

Versekerbare belang

Jy kan slegs eiendom verseker waarin jy 'n versekerbare belang het. Jy het 'n versekerbare belang in 'n item slegs as jy 'n direkte finansiële verlies sal ly indien die item verloor of beskadig word.

Bevestiging van dekking en bewys van eienaarskap

Gaan asseblief alle besonderhede in jou polisskedule sorgvuldig na en kontak ons of jou makelaar onmiddellik indien enige besonderhede verkeerd is of verander moet word.

Indien jy ons of jou makelaar nie binne 14 dae na die datum waarop die polisskedule aan jou ge-pos, ge-epos of aan jou gegee is, kontak nie, sal die inligting daarin as korrek beskou word.

Maak seker dat die versekerde bedrae realisties is en dat jy nie oor- óf onderverseker is nie. Jou makelaar sal jou hiermee kan help en advies kan gee.

Bewaar asseblief alle bewys van aankope en spuitprogramme van jou gewasse op 'n veilige plek, omdat ons jou om bewys van eienaarskap of bewys van waarde kan vra vir 'n item wat jy by ons verseker het.

Wanneer dekking begin

Die aanvangsdatum (begindatum) van jou dekking is die datum waarop ons ooreengekom het dat die polis sal begin.

Volg die reëls

Jy moet aan die bepalings en voorwaardes van hierdié en al die ander afdelings van die polis voldoen. Indien jy nie daaraan voldoen nie, kan dit die uitkoms van jou eis affekteer.

Vertel die waarheid

Enige wesentliche wanvoorstelling, wanbeskrywing of nie-openbaarmaking kan die betrokke item, afdeling of onderafdeling van die polis ongeldig maak. Onthou, eerlikheid betaal.

Hou by die regulasies

Jy moet aan al die toepaslike wetsbepalings en regulasies, riglyne vir beste praktyke, en munisipale en provinsiale regulasies voldoen wat op jou besigheidsaktiwiteite, werknemers, kliënte, goedere, dienste en produkte (vervaardig, voortgebring of verskaf) van toepassing is, asook die toepaslike bepalinge van die Korttermynversekeringswet, Wet Nr. 53 van 1998, soos gewysig.

Geen skending nie

Die voorwaardes en waarborge van hierdie polis sal afsonderlik op elk van die versekerde risiko's van toepassing wees, en nie gesamentlik op die risiko's nie. 'n Verbreking van enige voorwaarde of waarborg sal dus die polis slegs ongeldig maak ten opsigte van al die risiko's waarop die verbreking van toepassing is, en nie die polis ten opsigte van die ander risiko's affekteer nie.

Toegang tot die versekerde eiendom

Jy moet ons, of enige 1 van ons verteenwoordigers, toegang gee tot jou versekerde eiendom te alle tye, soos wat redelik is.

Openbaarmaking

Voordat jy hierdie versekering uitneem, en voordat jy veranderings aan jou bestaande polis aanbring, moet jy:

- Ons vertel van enigiets wat jy weet, of wat redelikerwys van jou verwag kan word om te weet, wat 'n invloed kan hê op ons besluit om jou risiko's te verseker, of op die voorwaardes van ons versekering van jou risiko's.
- Al die plase en lande benoem waarin jy 'n belang het en waar spesifieke tipes gewasse geplant of moontlik geplant sal word.

As jy dit nie doen nie:

- Kan ons ons aanspreeklikheid ten opsigte van 'n eis verminder of uitsluit, of die polis kanselleer vanaf die datum van die wanvoorstelling of nie-openbaarmaking.
- Sal jy nie gedek word vir enige area van 'n gewas wat nie gespesifiseer word nie.
- Sal enige eis wat jy instel ten opsigte van 'n gewas wat jy moontlik onderverseker het, aan die beginsel van awery onderworpe wees. Dit beteken jou eis sal in verhouding tot die onderversekering verminder word.

Geen oordrag

Jy mag onder geen omstandighede, jou regte teenoor ons met betrekking tot hierdie polis, oordra, afstaan, oor doen of in enige manier daarvan ontslae raak nie.

Underskrywingsbestuurder

Die onderskrywingsbestuurder ten opsigte van hierdie polisdokument is Gemoedsrus Verskansing wat deur ons opdrag gegee is ingevolge 'n geskrewe ooreenkoms.

Algemene uitsluitings... Dinge wat NIE deur ons gedek word nie

Neem asseblief kennis:

Indien jou eis afgewys word omdat ons sê dat 1 of meer van hierdie uitsluitings van toepassing is, is dit jou verantwoordelikheid om die teendeel te bewys.

Hierdie algemene uitsluitings is van toepassing op alle aspekte van jou versekeringspolis. Jy sal nie skadeloos gestel word vir enige verlies, skade, dood, besering of aanspreeklikheid wat direk of indirek deur enige van die volgende veroorsaak of daardeur aangehelp word nie:

Gekonfiskeerde, verbeurde of teruggehoue eiendom

Jy's nie gedek vir eiendom wat wettig teruggehou, verbeur of gekonfiskeer is nie.

Onteiening en nasionalisering

Jy's nie gedek vir verlies of skade wat direk of indirek ontstaan as gevolg van die wettiglike beslaglegging, konfiskering, rekwisisie of nasionalisering van enige geoeste of nie-geoeste versekerde gewas.

Gevolglieke verlies

Jy's nie gedek vir enige gevolglieke verlies of skade nie, behalwe indien die polisskedule spesifiek meld dat skade of verlies van hierdie aard gedek sal word.

Kontaminasie of besoedeling

Jy's nie gedek vir enige regaanspreeklikheid, verlies of skade wat direk of indirek deur besoedeling, kontaminasie of sydeling veroorsaak word nie.

Kernrisiko's

Jy's nie gedek ten opsigte van verlies of skade wat direk of indirek veroorsaak word deur:

- Kernreaksie.
- Ionisasie, uitstraling van, of kontaminasie deur, radioaktiwiteit wat afkomstig is van enige kernbrandstof of kernafval, of van die verbranding van kernbrandstof.

- Die radioaktiewe, toksiese, plofbare of ander gevaarlike eienskappe van enige kerninstallasie, kernreaktor of ander kerntoerusting, of enige kernonderdeel daarvan.
- Enige wapen of toestel wat atoom- of kernsplyting, -samesmelting of 'n soortgelyke reaksie gebruik, of radioaktiewe krag of materiaal.
- Die radioaktiewe, toksiese, plofbare of ander gevaarlike eienskappe van enige radioaktiewe materiaal.

Kontraktuele aanspreeklikheid

Jy's nie gedek vir enige verlies voortspruitend uit kontrakbreuk nie.

Onwettige bedrywighede

Jy's nie gedek vir enige verlies of skade wat veroorsaak word deur die gebruik van die versekerde eiendom vir, of in verband met, 'n onwettige bedrywigheid en/of die pleeg van 'n misdaad nie.

Oproer, oorlog, politieke optrede, terrorisme of enige pogings daartoe

Jy's nie gedek vir burgerlike beroering, enige arbeidsoptrede of staking, openbare wanorde of enige daad wat daarop bereken is om enige van die volgende teweeg te bring:

- Oorlog, optrede van 'n buitelandse vyand of oorlogsbedrywighede (ongeach of oorlog verklaar is of nie) of burgeroorlog.
- Militêre opstand of magsoorname, krygswet, rebellie of revolusie wat die afkondiging of handhawing van krygswet bepaal.
- Enige optrede (ongeach of dit ten behoeve van enige organisasie, liggaam, persoon of groep persone is) wat daarop bereken is om enige staat, regering of provinsiale, plaaslike of stamowerheid met dwang of deur vrees, terrorisme, geweld of protes teen hulle omver te werp of te beïnvloed.
- Enige optrede wat daarop bereken is om verlies of skade te veroorsaak met die voorneme om 'n politieke oogmerk te bevorder, om maatskaplike, ekonomiese, godsdienstige, persoonlike, etniese of ideologiese verandering teweeg te bring.
- Enige terreurdaad, insluitend die gebruik van of dreigement om krag of geweld te gebruik, deur enige persoon of groep persone (ongeach of hulle alleen of namens 'n ander optree, en of dit skadelik is vir menselewens of nie), met die voorneme om 'n regering te beïnvloed of die publiek aan vrees te onderwerp.
- Die optrede van 'n wettige owerheid om op enige ander wyse 'n gebeurtenis te hanteer waarna in enige van die klousules hierbo verwys word.

Sanksiebeperking

Jy's nie gedek nie, en ons sal nie 'n betaling maak of 'n voordeel verskaf wat ons sal blootstel aan enige sanksie, verbod of beperking ingevolge enige resolusies van die Verenigde Nasies (VN), of die handels- of ekonomiese sanksies, wette of regulasies van die Europese Unie (EU), Verenigde Koninkryk (VK) of Verenigde State van Amerika (VSA).

Werkstaking

Jy's nie gedek vir staking of vertraging van enige werk, proses of werksaamheid nie.

Kragnetwerk onderbreking

Jy's nie gedek vir enige verlies, skade, aanspreeklikheid, eis, koste, blootstelling, uitgawe of enige ander som van enige aard nie, insluitend enige gevolglike verlies, wat direk of indirek, ongeag enige ander oorsaak of voorval wat gelyktydig of in enige ander volgorde bydra, veroorsaak word deur, of verwant is aan, of voortspruit uit, die volgende:

- Kragnetwerk onderbreking.
- Die herstel van toevoer van elektrisiteit deur die nutsverskaffer na 'n kragnetwerk onderbreking.

Wat ons bedoel as ons sê...

| | |
|---------------------------------|---|
| Kragnetwerk onderbreking | 'n Onderbreking of opskorting van elektrisiteitstoevoer vanaf enige elektriese kragtoevoernetwerk aan enige eindgebruiker om watter rede ook al, hetsy weens skade, 'n onvermoë en/of mislukking (hetsy gedeeltelik of totaal) van die nutsverskaffer om elektrisiteit op te wek, oor te dra of te versprei, of andersins |
| Gevolglike verlies | Gevolglike verlies wat voortspruit uit 'n kragnetwerk onderbreking sluit in, maar is nie beperk tot: <ul style="list-style-type: none">• Die onderbreking van ander nutsdienste soos water, riool en telekommunikasiestelsels, hetsy verskaf deur openbare of privaat entiteite.• Moontlike vertragings op eise as gevolg van die onbeskikbaarheid van onderdele, voorraad, vervangingsitems en die uitloop van jou motoruurtydperk. |

Ons B's & V's

Begindatum

Dekking deur hierdie polis begin tydens ons ontvangs en aanvaarding van die opkomverslag, of tydens die aanvangstydperk wat in jou polisbylae gemeld word, watter datum ook al die laatste is.

Begindatum: Alle ander gevare

Dekking van versekerde gewasse begin na die laatste van:

- Mielies en sorghum: V3-groEIFase.
- Sojabone en sonneblomme: V4-groEIFase.

Wanneer ons die skriftelike opkomverslag ontvang en aanvaar het.

Begindatum: Hael, brand, transito en sprinkaan

Dekking van versekerde gewasse begin om 07:00 op die sewende dag na die aanvaarding van die kwotasie. Dekking is onderhewig aan die aanvaarding van die opkomverslag. Waar die land nie aanvaar word vir inkomste waarborg versekering nie, het jy die geleentheid om daardie land aan te bied vir hael versekering.

Ryp op kommersiële mielies, graansorghum, sonneblomme en ander gewasse soos gespesifiseer in polisskedule

Dekking van versekerde gewasse begin om 07:00 op 10 Oktober, of om 07:00 op die sewende dag na die aanvaarding van die kwotasie, of nadat die gewas opgekom het, watter datum ook al die laatste is.

Bybetalingsbedrae

Die toepaslike bybetalingsbedrae is soos volg:

- Ryp op kommersiële mielies, sojabone, sonneblom graansorghum: 10% van die totale gewaarborgde bedrag, of soos gespesifiseer in jou polisskedule.
- Hael:
 - Soos gespesifiseer in jou polisskedule.
 - Gewasse in windrye met 'n bybetaling van 20%.
- Brand en transito: 10% van elke eis.
- Oorplantkoste waar oorgeplant word: 5% bybetaling van versekerde waarde, indien nie oorgeplant word nie soos gespesifiseer in jou polisskedule.

Einddatum

Wanneer dekking tot 'n einde kom.

Einddatum: Oes

Dekking eindig sodra die versekerde gewas geoes, gesny, gepluk, herwerk, opgetel, oorgeplant, dood gespuit of versamel is op enige moontlike manier. Dekking strek nie later nie as die normale oestyd, soos bepaal deur ons assessor/s per gewas, of op 31 Augustus elke jaar, watter datum ook al eerste is, behalwe as:

- Saad spontaan begin uitloop of spring.
- Gewasse geoes word voor dit geassesseer is.
- 'n Ander einddatum in jou polisskedule gemeld word.

Einddatum: Brand

Branddekking eindig op 31 Augustus vir somergewasse.

Einddatum: Hael op mielies en graansorghum

Haeldekking eindig op 31 Augustus.

Sojabone

Haeldekking eindig op 31 Mei, of wanneer saad spontaan begin uitloop, of wanneer die normale oestyd verby is, watter een ook al eerste gebeur.

Sonneblomme

Haeldekking eindig op 30 Junie, of wanneer saad spontaan begin uitloop, of wanneer die normale oestyd verby is, watter een ook al eerste gebeur.

Einddatum: Transito

Transito dekking eindig:

- Sodra 'n versekerde gewas verder as 100km van die versekerde plaas af is.
- 30 dae na die oes.

Eisegeskil en -verjaring

As jy nie saamstem met die uitkoms (ons finale besluit) van jou eis nie, mag jy amptelik beswaar aanteken. Jy het 9 maande vanaf die datum waarop jy ons finale besluit ontvang het, om dit te doen. Gedurende die eerste 90 dae (3 maande) van hierdie tydperk mag jy direk by ons beswaar aanteken deur 'n e-pos aan yourcouncil@kingprice.co.za te stuur.

Vanaf die eerste dag na hierdie 90-dae tydperk, het jy dus 'n verdere 6 maande om ons te dagvaar. As jy nie binne enige van hierdie tydperke jou beswaar formeel aanteken nie, het jy nie verder die reg om dit te doen nie.

Geskilresolusie

Indien jy enige geassesseerde verlies of skade wil betwis, moet jy ons binne 3 dae na die assessering in kennis stel van jou voorneme om die geskil deur geskilbeslegting by te lê. Moenie die eisverslag teken nie en nomineer jou deskundige.

Indien die geskil oor 'n boontjiegewas in die R9-groefase (fisiologies ryp) gaan, moet jy binne 6 uur jou voorneme verklaar.

Ons sal ook 'n deskundige aanstel en die 2 deskundiges sal saam 'n beregter aanstel. Elke party is verantwoordelik vir die koste van sy eie deskundige. Die party wat die geskil verloor, is verantwoordelik vir die beregter se fooi.

Gedurende die geskilbeslegtingproses mag slegs die deskundiges en die beregter teenwoordig wees. Die geskilbeslegtingproses moet voldoen aan ons assesseringsprosedures.

'n Geskilresolusie assesseringsproses sal altyd die oorspronklike assessering vervang. Geskilresolusie besluite is finaal en bindend op alle partye, en geen appèl kan aangeteken word nie.

Inspeksie-assessering

'n Inspeksie-assessering kan deur jou of jou makelaar aangevra word.

Indien die inspeksie-assessering en die oorspronklike assessering:

- Met minder as 5% verskil, moet die party wat die inspeksie aangevra het, ons R1,000 per uur en R6 per kilometer betaal vir die inspeksie. In hierdie geval, bly die oorspronklike assessering van krag.
- Met meer as 5% verskil, is die party wat die inspeksie aangevra het nie vir die koste aanspreeklik nie. In hierdie geval, word die inspeksie-assessering wat gedurende die geskilresolusieproses gedoen is, van krag.

Geskille moet binne 36 uur opgelos word in die geval van bone in die fisiologiese ryp groeistadium. Enige ander gewas moet binne 5 werksdae vanaf kennisgewing opgelos word.

Kansellasië

Jy mag slegs jou polis met ons eksplisiete skriftelike toestemming kanselleer.

Ons behou verder die reg voor om hierdie polis onmiddellik te kanselleer, of om die waarde van die dekking wat ingevolge hierdie polis verskaf word, te verminder in die geval van 'n wesenlike wanvoorstelling deur jou.

Voorkoming van skade

Jy moet skriftelike rekords hou van algemeen aanvaarde boerderypraktyke wat op jou versekerde plase gevolg word, insluitend:

- Aanplantdatums.
- Direkte insetkoste.
- Opkomdatums.
- Kilogram saad per hektaar.
- Kultivarkeuse en aankoop sertifikaat.
- Grondontleding: Kan deur die onderskrywingsbestuurder aangevra word.
- Kunsmis-aanbevelings en aankoopsertifikaat.
- Plaag- en siektebeheer; en die aankoopsertifikaat daarvan.
- Finansiële state en verskaffersfakture.
- Besproeiingsskedules met prodata verslae.
- Weerdata waar weer masjien naby geleë is.
- Enige leweringstrokies soos versoek.

Jy moet:

- Goeie en aanvaarbare boerderypraktyke toepas wat die verbouing van jou gewasse betref.
- Verseker dat al jou meganiese toerusting in 'n goeie werkende toestand is om skade aan, of verlies van, jou versekerde gewasse te voorkom of te beperk.
- Alle redelike stappe doen en voorkomingsmaatreëls toepas om skade aan, of verlies van, jou versekerde gewasse te voorkom.

Die dinge wat jy moet doen

Betaal ons

Betaal jou premies betyds en deurentyd, per maandelikse debietorder of jaarliks, halfjaarliks of kwartaalliks, soos ooreengekom.

Wees eerlik

Gee altyd vir ons ware en volledige inligting wanneer jy om dekking aansoek doen, veranderings aan jou polis aanbring of 'n eis indien. Ons gebruik die inligting wat jy aan ons verskaf, om die dekking, dekkingsvoorwaardes en die betaalbare premie te bepaal.

Onakkurate of onvolledige inligting kan meebring dat jy nie dekking het nie, en kan die uitkoms van jou eis affekteer. Dit geld ook wanneer enigiemand anders namens jou optree. Onthou, eerlikheid betaal.

Sê vir ons

Laat weet ons onmiddellik van enige veranderings aan jou versekerde oes wat 'n invloed kan hê op die dekking wat ons vir jou gee of dit sal voortsit, of wat die dekkingsvoorwaardes of die premie wat ons jou vra, kan affekteer.

Dit sluit enige veranderings tot jou inligting, of verkeerde besonderhede, in, soos:

- Persoonlike en besigheidsinligting: Al jou persoonlike en besigheidsbesonderhede in jou polisskedule is baie belangrik.
- Finansiële status: Enigiets wat ons oor jou finansiële posisie of dié van 'n lid, vennoot of direkteur moet weet. Dit hou spesifiek verband met wanbetalings, siviele vonnisse, sekwestrasies, administrasiebevele, skuldherstelling, likwidasies of besigheidsredding van maatskappye.
- Enige ander faktore wat jou dekking en/of skadebepaling kan beïnvloed.

Kyk na jou goed

Neem alle redelike en nodige stappe om verlies, skade of aanspreeklikheid te voorkom of tot die minimum te beperk.

Dit sluit in:

- Nakoming van alle wetsvereistes, vervaardigers se aanbevelings en beste praktyke met betrekking tot jou besigheid, jou werknemers, kliënte en die goedere en dienste wat deur jou vervaardig of verskaf of verbou word.
- Instandhouding van die versekerde eiendom of items in 'n bruikbare en goeie toestand.
- Goeie boerdery praktyke.



Ons eisprosedure

Jy moet ons in kennis stel van enige voorval wat tot 'n eis aanleiding kan gee, selfs al besluit jy om nie te eis nie.

Eise moet binne die volgende spertye ingedien word:

| | |
|---|--|
| Brand en transito | <ul style="list-style-type: none">• 24 uur na die voorval• Met transito het jy 20 werksdae om die nodige dokumentasie t.o.v. die eis in te dien |
| Hael | 3 dae nadat die skade voorgekom het |
| Ryp op kommersiële mielies, graansorghum, sonneblomme, en sojabone | 3 dae nadat die skade voorgekom het |
| Droogte | Binne 14 dae nadat die skade plaasgevind het |
| Hittegolf | Binne 7 dae nadat die skade plaasgevind het |
| Oormatige reënval | Binne 3 dae nadat die skade plaasgevind het |
| Oorstroming | Binne 3 dae nadat die skade plaasgevind het |
| Onbeheerbare plantsiektes en plaë | Binne 14 dae nadat die skade plaasgevind het |

Neem asseblief kennis:

Wanneer jy 'n voorval aanmeld, moet jou makelaar 'n skadeverslag voltooi. Eise word nie van jou premie verhaal nie. Die geoeste opbrengs moet 10% laer as die goedgekeurde langtermyn gemiddelde opbrengs (LGO) wees om 'n geldige eis te regverdig.

Die prosedure wat ons volg om die skade te bepaal:

- Ons sal 'n assessor aanstel wat die voorgeskryfde assesseringsprosedure gebruik om skade te bepaal.
- Jy mag nie met die assesseringsprosedure inmeng of 'n struikelblok vir die assessor veroorsaak nie. Enige inmenging of hindernisse deur jou veroorsaak kan lei tot 'n eis wat afgekeur word.
- Die assessor kan die assessering uitstel om die omvang van die skade korrek te bereken.
- Ons mag enige assessering hersien, verander of aanpas in die geval van 'n ooglopende fout, die toepassing van die verkeerde assesseringsprosedure, of monsters wat verkeerd geneem is.
- Slegs jy as die versekerde, of jou gevolmagdigte verteenwoordiger mag teenwoordig wees tydens assessering. Enige ander persoon/instansie moet skriftelike toestemming vanaf die onderskrywingsbestuurder verkry.
- Die onus rus op jou om jou kontakbesonderhede altyd op datum te hou sodat die assessering betyds uitgevoer kan word.
- Bone: Indien daar haelskade op bone (droë en sojabone) is, moet assessering binne 3 dae plaasvind.
- Jy moet 'n gekarteerde/GPS kaart aan ons verskaf waarop 'n assessering uitgevoer kan word. Indien verkeerde kaart oorhandig/ingedien is, sal assessering staande bly op lande wat geassesseer is.

Neem asseblief kennis:

- **Jy's nie gedek as jy die beskadigde gewas, omwerk of oorplant voordat die assessering voltooi is nie.**
- **Indien daar aangedring word op assessering buite die normale assesseringsprosedure, sal daardie assessering geag word as die finale assessering en mag daar nie aangevra word vir 'n herassessering nie.**
- **Jy moet ons 14 dae voordat jy beplan om die beskadigde gewas te oes, laat weet.**
- **Ons sal 'n assesseringskoste van R1,000 per uur en R6 per kilometer wat deur ons assessor afgelê word, vra indien die gemelde oesdatum uitgestel word omdat:**
 - 'n Stroper nie beskikbaar is nie of gedurig onklaar raak.
 - Daar nie genoeg vragmotors/waens beskikbaar is om die geoeste graan te verwyder nie.
 - Die gewas te nat is om te oes.
 - Koste word verhaal vanaf eis.

Gewasse: Inkomste waarborg

In kort...

Kom ons gesels oor die weer. Veral oor hoe die weer jou oeste kan vernietig of laat skade ly... En hoe ons jou ondersteun wanneer dit gebeur. Want wanneer ons sê 'deur die natuur gekweek, deur die koning beskerm', bedoel ons dit. Dis juis hier waar die koring van die kaf geskei word. Ons voeg die daad by die woord.

Ons B's & V's

Waar hierdie terme ook al in hierdie polisdokument voorkom, beteken hulle die volgende.

| | |
|---|---|
| Aangeplante area/ha/ oppervlakte | Die produktiewe hektaar van jou versekerde lande wat met die versekerde gewas beplant is, soos aangedui op 'n GPS-kaart en uitgedruk in hektaar |
|---|---|

Neem asseblief kennis:

- 'n Land se oppervlakte soos verseker, sal nie verander word nadat skade/'n voorval plaasgevind het nie. Byvoorbeeld: Wanneer 'n land 100ha groot is en uit 4 dele bestaan (A: 25ha; B: 25ha; C: 15ha, en D:25 ha) sal die land getakseer word as 100ha.
- Dit kan met die opkomverslag verander word.

| | | | | | | | | | | | |
|---|---|---------------------|-------------|----------------------|-----------|-------------------------|-----------|-----------------------|-------------|-------------------------|-----------|
| <p>Aanvangsprys</p> | <p>Die prys wat gebruik word vir die aanvanklike berekening van die versekerde bedrag. Dit is die Safex-prys van die leweringskontrak vir gewasse op die tydstip wanneer jy om hierdie versekering aansoek doen. Hierdie prys kan verander word terwyl die opkomverslag gefinaliseer word. Jy het egter jaarliks net 1 kans om die prys aan te pas en dit moet voor die eerste Vrydag in November plaasvind</p> <p>Die aanvangsprys sal bereken word deur 'n gemiddelde Safex-prys vir die laaste 30 verhandelingsdae van die maand te gebruik</p> <p>Die aanvangsprys per gewas sal soos volg bereken word:</p> <table data-bbox="385 539 818 691"> <tr> <td>Safex-prys: Mielies</td> <td>Einde Julie</td> </tr> <tr> <td>Safex-prys: Sojabone</td> <td>Einde Mei</td> </tr> <tr> <td>Safex-prys: Sonneblomme</td> <td>Einde Mei</td> </tr> <tr> <td>Kontrak-prys: Sorghum</td> <td>Einde Julie</td> </tr> <tr> <td>Kontrak-prys: Droë bone</td> <td>Einde Mei</td> </tr> </table> | Safex-prys: Mielies | Einde Julie | Safex-prys: Sojabone | Einde Mei | Safex-prys: Sonneblomme | Einde Mei | Kontrak-prys: Sorghum | Einde Julie | Kontrak-prys: Droë bone | Einde Mei |
| Safex-prys: Mielies | Einde Julie | | | | | | | | | | |
| Safex-prys: Sojabone | Einde Mei | | | | | | | | | | |
| Safex-prys: Sonneblomme | Einde Mei | | | | | | | | | | |
| Kontrak-prys: Sorghum | Einde Julie | | | | | | | | | | |
| Kontrak-prys: Droë bone | Einde Mei | | | | | | | | | | |
| <p>Assesseringsprosedure</p> | <p>Die prosedure wat ons volg om die skade te bepaal wanneer 'n skade voorval gerapporteer word</p> | | | | | | | | | | |
| <p>Assessor</p> | <p>Die assessor wat deur ons aangestel word om die ondersoek te doen en die gerapporteerde verliese te assessee, deur die voorgeskrewe assesseringsprosedure te volg</p> | | | | | | | | | | |
| <p>Betaaldatum</p> | <p>Betaaldatum is die ooreengekome datum wat in die polisskedule aangedui word wanneer die betaling sal geskied</p> | | | | | | | | | | |
| <p>Kwantitatiewe verlies</p> | <p>Slegs kwantitatiewe verliese sal bepaal word en uitgedruk word as 'n persentasie van die versekerde waarde. Kwalitatiewe verliese word nie gedek nie, met wit en geel mielies as uitsondering</p> | | | | | | | | | | |
| <p>Minimum premie betaalbaar</p> | <p>'n Minimum bedrag betaalbaar volgens hierdie versekering sal nie minder wees as R10,000 nie. As jou premiebedrag minder as R10,000 is, sal jou premie outomaties na 'n minimum van R10,000 aangepas word</p> | | | | | | | | | | |

| | |
|---------------------------------|---|
| Oes | Kap, sny, oplig, oorwerk, oorplant, doodspuit of insamel van gewasse op enige manier |
| Oorplantkoste | <p>Oorplantkoste is die vervanging van die gewas van enige produk op enige grondgebied van grond deur sodanige aksie te neem as wat bereken word om op dieselfde gebied 'n gewas van dieselfde produk te produseer</p> <p>Wanneer die geassesseerde skade meer as 40% van die oesverlies beloop, word skade vergoed as 40% van versekerde waarde van die oorspronklike versekerde gewas en versekerde land. Daar is 'n bybetaling van 5% van die versekerde waarde van toepassing, ongeag die gekose vergoedingskeuse vergoedingskeuse. Die land moet eers skriftelik, in die vorm van 'n opkomverslag, aanvaar word</p> <p>Jy's nie gedek as jy 'n beskadigde land sonder ons toestemming oorplant nie. As 'n land oorgeplant word en jy wil dit verseker, moet jy by ons aansoek doen om dekking. Ons sal 'n herstellingspremie en die normale aanvaardingsvoorwaardes vir die land se versekerde waarde toepas</p> |
| Premie bedrag betaalbaar | Die totale premie bedrag betaalbaar word in jou polisskedule gemeld. Hierdie bedrag sal verander as ons instem om die waarde van die opbrengs of die aantal hektare wat verseker word, aan te pas en 'n bygewerkte polisskedule sal uitgereik word |

Neem asseblief kennis:

- **Bedrag betaalbaar kan nie weerhou word as daar 'n dispuut van enige aard ontstaan nie.**
- **Rente is betaalbaar op enige laat betalings teen prima plus 5 persentasiepunte terugwerkend vanaf teken datum.**

| | |
|------------------------------|--|
| Safex | Die Suid-Afrikaanse Termynbeurs, 'n afdeling van die Johannesburgse Aandelebeurs |
| Skadepersentasie | Verlies of skade soos bepaal deur ons assessor |
| Skadeverslag | 'n Elektroniese dokument wat die volgende insluit: <ul style="list-style-type: none"> • Tipe gewas • Datum van skade • Tipe skade • Beskadigde versekerde lande |
| Versekerde plaas | Die plaas wat in jou polisskedule gemeld word. Dis die totale grondoppervlakte wat deur jou besit of gehuur word en gebruik word om die gewasse te verbou wat deur hierdie versekering gedek word |
| Versekerde land | 'n Land wat in jou polisskedule gemeld word. Lande moet duidelik geskei wees deur 'n heining, pad, kontoerwal, of iets soortgelyk. As daar nie 'n duidelike skeiding is nie, kan ons assessors die land (wat moontlik uit verskeie lande bestaan) as 'n enkele entiteit assessee |
| Versekerde skade | Skade wat veroorsaak word deur versekerde gevare soos gemeld in jou polisskedule |
| Berekende eiswaarde | Gewaarborgde of herberekende gewaarborgde inkomste minus die berekende inkomste |
| Droogte | Die gebrek aan grondvog wat nodig is vir optimale groei in alle ontwikkelingsfases van 'n gewastipe |
| Geasseseerde opbrengs | Die werklike tonnemaat van die geoeste versekerde gewas, soos deur ons bepaal, en volgens die voorgeskrewe assesseringsprosedure geoes |
| Hittegolf | Temperature van 38°C of hoër wat 10+ dae aaneen voortduur |

| | | |
|-----------------------------|--|---|
| Inkomste: Bereken | Die berekende inkomste word soos volg bepaal: Geasseseerde opbrengs x Safex-prys (R/ton) + enige uitbetaling onder die 'Gewasse: Hael KPPD' (brand, ryp, tansito, en oorplantkoste-hael) en oorplantkoste van hierdie versekering | |
| | Safex-prys: Mielies | Gemiddeld van laaste 30 dae in Julie |
| | Safex-prys: Sojabone | Gemiddeld van laaste 30 dae in Mei |
| | Safex-prys: Sonneblomme | Gemiddeld van laaste 30 dae in Mei |
| | Kontrak-prys: Sorghum | Versekerde prys/ton soos in jou polisbylae gemeld |
| | Kontrak-prys: Droë boon | Versekerde prys/ton soos in jou polisbylae gemeld |
| Inkomste: Gewaarborg | <p>Die gewaarborgde inkomste sal soos volg bereken word: Verwagte inkomste x waarborgpersentasie, soos deur ons goedgekeur</p> <p>Die gewaarborgde inkomste van die versekerde gewas per polis sal soos volg bereken word: Totale versekerde aantal hektaar x verwagte inkomste per hektaar x gewaarborgde persentasie per versekerde gewas</p> <p>Die gewaarborgde inkomste per gewas word in jou polisbylae gemeld</p> <p>Gewastipes kan na goeddunke saamgevoeg word en in sulke gevalle sal 'n gekombineerde gewaarborgde inkomste in jou polisbylae gemeld word</p> | |

| | |
|----------------------------------|---|
| Voorversekerings-taksasie | <p>Wanneer skade plaasvind binne die wagperiode of wanneer 'n polis nog nie uitgeneem is nie. Die skadebedrag plus die bybetaling/vrystelling sal dan van enige verdere eis afgetrek word</p> <p>Indien die skade tydens jou wagperiode plaasvind, het jy die keuse om met die polis voort te gaan of dit te kanselleer. Jy is verantwoordelik vir die assessorkoste indien daar nie voortgegaan word met die dekking nie</p> |
|----------------------------------|---|

Neem asseblief kennis:

Ten tyde van 'n eis sal die berekende inkomste op die gekombineerde gewaarborgde inkomste gebaseer word. Eise sal gebaseer word op die enkele gekombineerde gewaarborgde waarde.

| | |
|---|---|
| Inkomste: Verwag | <p>Die verwagte inkomste per hektaar sal soos volg bereken word:</p> <ul style="list-style-type: none"> • Langtermyn gemiddelde opbrengs (ton/hektaar) x aanvangsprys van versekerde gewas (R/ton) x, soos deur ons goedgekeur <p>Die verwagte inkomste van die versekerde gewas per polis sal soos volg bereken word:</p> <ul style="list-style-type: none"> • Totale versekerde getal hektaar x verwagte inkomste per hektaar |
| Langtermyn gemiddelde opbrengs (LGO) | <p>Gemiddelde boerdery-opbrengs/hektaar oor die afgelope 10 jaar</p> |
| Waarborgpersentasie | <p>Die persentasie, soos toegeken deur ons, wat gewaarborg sal word vir die gewas per polis</p> |
| Verslae | <p>Verslae kan enige tyd en sonder jou toestemming gedoen word</p> |

| | |
|--------------------------|---|
| Opkomverslag | 'n Opkomverslag verifieer die grootte van die aangeplante gebied, die aanplantingsdatums en die toestand van die gewas wat opgekom het. Indien hierdie verslag 'n land vir Inkomste waarborg diskwalifiseer, moet jy die land teen hael verseker |
| Vorderingsverslag | 'n Vorderingsverslag verifieer jou boerderypraktyke en kan daartoe lei dat jou versekering gekanselleer word, indien daar gevind word dat jy nie normale boerderypraktyke toepas nie. In hierdie geval sal jou premie nie terugbetaal word nie. Jou haeldekking sal onveranderd bly |
| Oesskatting | 'n Oesskattingverslag toon die verwagte opbrengs van 'n versekerde gewas, en dui aan of die moontlikheid van 'n eis bestaan |

Bybetaling/vrystelling

Jou bybetaling/vrystelling is 'n persentasie van die versekerde waarde en kan van toepassing wees per land of polis, soos aangedui in jou polisskedule.

Berekende inkomste

Berekende inkomste = oesopbrengs x Safex-prys.

Indien die berekende inkomste meer as die gewaarborgde waarde is, is daar geen eis nie.

'n Eis kan ontstaan indien die berekende inkomste minder is as die gewaarborgde waarde a.g.v. versekerde risiko. 'n Versekerde insident moet plaasvind. Indien die geplante oppervlakte minder is as die versekerde oppervlakte, sal die eis bereken word op die werklike oppervlakte, geen premie terugbetaling sal gedoen word nie.

Indien jou graan afgegradeer (slegs van toepassing op wit en geel mielies) word weens 'n versekerde gevaar, sal die oeswaarde soos volg bereken word:

- YM2: Sal geag word om YM1 te wees.
- YM3: Sal geag word om die Safex-prys te Randfontein op die gedegradeerde graan minus die standaardvermindering per ton te wees.
- Ondergraad: Ons sal met jou oor 'n waarde per ton ooreenkom.

Plus enige eise bepaal vir:

Brand

Brandeise sal betaal word op die grondslag van potensiële inkomste of versekerde inkomste, watter een ook al die laagste is. Potensiële inkomste word bereken op die landery se produksie voor die brand, vermenigvuldig met die Safex-prys op die dag van assessering.

Hael: Gedek deur 'n inkomstewaarborgpolis (geen addisionele hael dekking is uitgeneem nie)

'n Skade-assessering sal vir rekorddoeleindes gedoen word, en daar is geen dekking ingevolge hierdie versekering nie. Die assessering sal 'n stroop-assessering wees en gedurende oestyd gedoen word.

Hael: Gedek onder 'Gewasse: Hael' (opsionele dekking: sien bepalinge en voorwaardes in die agri KPPD)

Die goedgekeurde LGO sal verminder word met die gemiddelde berekende persentasie vir hael- en rypskade soos bepaal op die versekerde gewasse. Die gewaarborgde inkomste sal dan herbereken word deur die gewysigde LGO te gebruik.

Neem asseblief kennis:

Aanvullende haeldekking word uitgesluit ingevolge kuilvoer.

Bybetaling per eis: Brand en transito

Slegs van toepassing op brand en transito en word as volg bereken.

| Voorbeeld | |
|---|---------------|
| 10% Bybetaling per eis | |
| Bybetaling % | 10% |
| Skadebedrag | R40,000 |
| Bybetalingsbedrag: Skadebedrag x bybetaling % | R40,000 x 10% |
| Eisbedrag: Skadebedrag - bybetalingsbedrag | R36,000 |

Bybetaling per polis

Jou bybetaling is 'n persentasie van die versekerde waarde per land.

| Voorbeeld | |
|--|-----------------------|
| 10% Bybetaling | |
| Versekerde bedrag | R2,000,000 |
| Bybetalingsbedrag: $R2,000,000 \times 10\%$ bybetaling | R200,000 |
| Skadeberekening van al die lande in die polis | R100,000 |
| Eisbedrag: Skadebedrag - bybetalingsbedrag | $R100,000 - R200,000$ |

Kombinasie: Bybetalingsbedrag/vrystellingsbedrag per land

Jou bybetalingsbedrag is 'n persentasie van die versekerde waarde per land en bly van toepassing. Die vrystellingsbedrag is 'n persentasie van die versekerde waarde per land. Indien die skadebedrag kleiner is as die vrystellingsbedrag, kan jy nie eis nie. Indien die skadebedrag groter is as die vrystellingsbedrag, verval die vrystellingsbedrag en slegs die bybetalingsbedrag bly van toepassing.

Kuilvoer

Indien lande sonder ons toestemming vir kuilvoer gesny word, sal ons die opbrengs van die gesnyde land beskou as die goedgekeurde LGO plus 50% van die LGO. Indien lande met ons toestemming gesny word en jy nie vir ons die tonnemaat van die gesnyde kuilvoer kan gee nie, sal ons die oesbare prestasie bereken as die berekende geraamde opbrengs, soos oesskatting, plus 25% van die geraamde opbrengs. Indien lande met ons toestemming gesny word en jy vir ons die tonnemaat van die gesnyde kuilvoer kan gee, sal ons die oesbare prestasie bereken as die geweegede tonnemaat van die kuilvoer gedeel deur 4.

Stroop-assesseringsprosedure

Ons assessor sal die werklike opbrengs van versekerde gewasse bepaal deur ons oesassesseringsprosedure te volg.

Jy moet 'n betroubare stroper wat in goeie werkende toestand is aan ons assessors beskikbaar stel, sodat ons jou oes opbrengs akkuraat kan bepaal. Indien die stroper nie in 'n aanvaarbare werkende toestand is nie, kan ons 'n stroperkontraakteur aanstel om die prosedure te voltooi, en hierdie koste sal deur jou betaalbaar wees, of vanaf die eis afgetrek word.

Indien jy lande of dele van lande oes voordat ons prosedure gedoen is, sal hierdie lande/dele geag word teen die aanvaarbare LGO + 50% geoes te wees.

Indien die prosedure begin het en nuwe skade voorkom, moet dit onmiddellik gestaak word, en die nuwe skade moet aan ons gerapporteer word. Ons assessor sal dan die opbrengs van die lande wat nog nie geoes is nie, by wyse van 'n geoeste assessering bepaal. Die geoeste area sal gemeet word, en die opbrengs daarvan sal hetsyop grond van die LGO of die werklik gestroopte tonnemaat bepaal word, wat ook al die hoogste is. Indien jy nie oesdepositostrokies aan ons verskaf om die gestroopte opbrengste te bereken nie, sal ons die LGO met 50% verhoog.

Wat deur die koning gedek word

Brand

Jy's gedek vir sigbare skade veroorsaak deur brand of weerlig terwyl die gewas nog op die versekerde land is, en op voorwaarde dat die vereistes van die Nasionale Wet op Veld- en Bosbrande, Nr. 101 van 1998, nagekom is.

Brandaise sal betaal word op die grondslag van potensiële inkomste of versekerde inkomste, watter een ook al die laagste is. Potensiële inkomste word bereken op die land se produksie voor die brand, vermenigvuldig met die Safex-prys op die dag van assessering.

Neem asseblief kennis:

Jy's nie gedek vir brandstiging nie.

Droogte

Jy's gedek vir sigbare, assesseerbare en kwantifiseerbare skade aan die versekerde gewas weens droogte.

Neem asseblief kennis:

Hierdie dekking word uitgesluit op 'Besproeiing' van hierdie versekering.

Hael

Jy's gedek vir sigbare, assesseerbare en kwantifiseerbare skade aan die versekerde gewas veroorsaak deur die impak van hael.

Hittegolf

Jy's gedek vir onherstelbare skade wat gedurende die groei- of ontwikkelingsfases van versekerde gewasse veroorsaak word deur langdurige of voortgesette hittegolwe wat die drempels van die betrokke gewasse oorskry.

Kwaliteitsverlies: Graadverlies

Graadverlies is die verlies aan kwaliteit. Jy's gedek vir graadverlies as gevolg van risiko's wat nie beheer kan word deur normale goeie boerderypraktyke en voldoende insek- en siektebeheer toe te pas nie.

Neem asseblief kennis:

Jy's nie gedek vir graadverlies weens die volgende nie:

- **Gebreekte sade of pitte.**
- **Vreemde stowwe.**
- **Hoë voginhoud.**
- **Sclerotinia.**

Onbeheerbare plantsiektes en plaë

Jy's gedek vir verlies of skade veroorsaak deur plaë en siektes wat nie deur die toepassing van voldoende insek- en siektebeheer en normale goeie boerderypraktyke beheer kan word nie.

Oormatige reënval

Jy's gedek vir kwalitatiewe en kwantitatiewe skade, vandat die opkoms verslag aanvaar is, wat direk veroorsaak word deur abnormale reënvakke oor 'n kort tydperk.

Oorstroming

Jy's gedek vir die verlies van of skade aan versekerde gewasse weens riviere of strome wat hul walle oorstrom as gevolg van oormatige reënval in die opvanggebied, met dien verstande dat ons aanspreeklikheid beperk word tot gewasse wat bo die vloedlyn is.

Transito

Jy's gedek vir die verlies of vernietiging van, of skade aan, die versekerde gewas as gevolg van brand, botsing en omslaan van die vervoermiddel, terwyl die gewas vervoer word na 'n verspreidingspunt op enige plek binne 'n omtrek van 100km van die versekerde plaas.

Neem asseblief kennis:

- **Jy's net gedek as jy jou eie voertuig/voertuie gebruik. Jy's nie gedek as jy gekontrakteerde voertuie gebruik nie.**
- **Vir transito eise het jy 20 werksdae om die nodige dokumentasie ten opsigte van die eis in te dien, anders verbeur jy jou eis.**

Ryp

Jy's gedek vir die sigbare en kwantifiseerbare skade aan kommersiële mielies, sonneblomme, graansorghum en sojabone veroorsaak deur ryp.

Wat NIE deur die koning gedek word nie

Chemiese en biologiese besmetting

Jy's nie gedek vir skade wat direk of indirek uit chemiese of biologiese besmetting voortspruit nie.

Onversekerde risiko's

Jy's nie gedek vir skade of verlies veroorsaak deur:

- Beheerbare siektes, of plaag- of insekbesmettings.
- Die brand van eiendom op las van 'n openbare, plaaslike of statutêre owerheid.
- Aardbewing.
- Vulkaanuitbarsting of ondergrondse brand.
- Chemiese bespuiting.
- Skade veroorsaak deur vee, wilde diere of voëls aan versekerde gewasse.
- Jou versuim om die gewasse te oes wat gereed is vir oes.
- Platgesnyde versekerde gewasse.
- Geoeste, gekapte en oorgeplante gewasse.

- Enige gewas indien goeie boerderypraktyke nie toegepas is nie.
- Versekerde gewasse terwyl dit vervoer word deur 'n gekontrakteerde derde party.
- Jou onvermoë om versekerde gewasse te plant of te oes.
- 'n Gewas wat ge-oes word voordat ons assessor dit kon assesseeer.
- Gewasse wat nie opkom nie.
- Enige insident waarvan jy ons nie binne 7 dae nadat die verlies plaasgevind het, in kennis gestel het nie.
- Die diefstal van versekerde gewasse.
- 'n Tekort aan water vir enige besproeide gewas.
- Ryp op gewasse wat nie gespesifiseer is nie.
- Nie-bemerkbare produkte.
- Droogte op besproeiing.

Oorplanting

Jy's nie gedek as jy 'n beskadigde land sonder ons toestemming oorplant nie.

Opsionele dekking

Dek meer. Betaal 'n bietjie meer

Jy kan kies om die volgende opsies by jou basiese 'Gewasse: Hael' te voeg. Indien jy enige opsie byvoeg, sal dit slegs gedek word as dit afsonderlik in jou polisskedule aangeteken is en 'n bykomende premie betaal word.

Oorplantkoste

Wanneer die geassesseerde skade meer as 40% van die oesverlies beloop, word skade vergoed as 40% van versekerde waarde van die oorspronklike versekerde gewas indien die land oorgeplant word. Daar is 'n bybetaling van 5% van die versekerde waarde van toepassing, maak nie saak watter vergoedingskeuse jy gekies het nie.

Neem asseblief kennis:

- Indien die land oorgeplant word is die balans van die oes 60% en jy neem nie weer 'n polis uit nie.
- Indien die land nie oorgeplant word nie, verloop jou polis soos 'n normale polis met die bybetaling wat jy gekies het.

Sasria

Sasria is die enigste korttermynversekeraar wat spesiale risikodekking verskaf aan alle persone en besighede wat bates in Suid-Afrika besit, asook aan staatsentiteite. Dis unieke dekking teen buitengewone risiko's soos burgerlike beroering, openbare onluste, stakings, oproer en terrorisme, en Suid-Afrika is 1 van 'n paar lande in die wêreld wat hierdie versekering verskaf.

Neem asseblief kennis:

Om vir Sasria-dekking te kwalifiseer, moet jy en enigiemand wat deur jou versekeringspolis gedek word, aan die B's en V's in hierdie polisdokument voldoen.

Jou Sasria-premie

As 'n sakeversekeringskliënt kan jy kies of jy hierdie bykomende dekking van Sasria wil hê of nie. As jy besluit om hierdie dekking by jou polis in te sluit, sal jou premie die Sasria-premie insluit, wat ons dan namens jou aan Sasria sal betaal.

[Klik hier](#) vir die Sasria-polisdokument, wat meer inligting bevat.

Sasria se kontakbesonderhede

| | |
|-----------------|--|
| Aanlyn | sasria.co.za |
| Posbus | 653367, Benmore 2010 |
| Adres | Frickerweg 36, Illovo, Sandton 2196 |
| Foon | +27 11 214 0800/0861 72 77 42 |
| Faks | +27 11 447 8630/0861 72 73 29 |
| Registrasie nr. | 1979/000287/30 |
| BTW nr. | 414019340 |
| FDV nr. | 39117 |
| E-pos | contactus@sasria.co.za |

Notas

A series of 20 horizontal dotted lines for writing notes.

